

**Uunga siunnersuut: Meeqqat tapersorneqarnissaannut Inatsisartut inatsisaata allangortinneqarnissaannut Inatsisartut inatsisaat**

(Meeqqanut, Inuusuttunut, Ilaqutariinnut Inatsisillu Atuutsitsinneqarnerannut Naalakkersuisoq)

**Saqqummiussissut**

(Meeqqanut, Inuusuttunut, Ilaqutariinnut Inatsisillu Atuutsitsinneqarnerannut Naalakkersuisoq)

**Siullermeerneqarnera**

Matumuuna Naalakkersuisut Meeqqat tapersorneqarnissaannut Inatsisartut inatsisaata allangortinneqarnissaa pillugu Inatsisartut inatsisissaattut siunnersuut saqqummiuppaat.

Akiliunneqarluni ukiumoortumik tikeraarluni angalasinnaatitaanerit meeqqanut eqqartuussut eqqartuussiviulluunniit aalajangernerata kingorna ulloq unnuarlu paaqqinnittarfimmut inissinneqarsimasunut atuutissanngimmat siunnersuutip erseqqissassavaa.

Meeqqat ulloq unnuarlu paaqqinnittarfimmut nunagisap avataaniittumut inissinneqarsimasut Meeqqat tapersorneqarnissaannut Inatsisartut inatsisaat malillugu ukiumut 2-riarlutik nunagisaminnut akiliunneqarlutik angalasinnaatitaapput.

Kisianni tikeraarluni angalasarnerit pillugit Inatsisartut inatsisaanni aalajangersakkani atuuttuni, meeqqap ulloq unnuarlu paaqqinnittarfimmi najugaqarnera kommunalbestyrelsimit ikiorsiinissaq pillugu aalajangiinermi tunngaveqarnerisooq imaluunniit eqqartuussut imaluunniit tamanna pillugu eqqartuussiviup aalajangiinera tunngaviunersooq, immikkoortinneqarneq ajorput.

Inatsisartut inatsisaanni allassimasunik nassuiaaneq taamaallaat isiginiaraanni, qanorluunniit kommunalbestyrelse ikiorsiilluni inissiinissamik neqeroruteqaraluarpat imaluunniit inissiineq Kalaallit Nunaanni Pinerluttulerinermi inatsimmi malittarisassat malillugit eqqartuussut tunngavigalugu pisimappat, eqqartuussivimmiilluunniit aalajangiinera kingorna inissiineq pisimappat, meeqqat nunagisamik avataanni Kalaallit Nunaanni ulloq unnuarlu paaqqinnittarfimmi inissimasut tamarmik ukiumut 2-riarlutik nunagisaminnut tikeraarlutik akiliunneqarlutik angalasinnaapput.

Meeqqanut ataasiakkaanut iliuusissanut pilersaarutit tunngavigalugit, meeqqat najukkap avataani ulloq unnuarlu paaqqinnittarfimmi inissinneqartut, nunaminnut ilaqtaminnullu attaveqarnermikkilattaassiinnarnissamik periarfissaqarnissaat Inatsisartut inatsisaanni tikeraarluni angalasarnerit pillugit aalajangersakkani eqqarsaataavoq.

Taamaammat siunnersuummi matumani meeqqat 15 18-illu akornanni ukiullit eqqartuussivimmit eqqartuussut tunngavigalugu imaluunniit tigummigallagaanissamut taarsiullugu allamut inissinneq tunngavigalugu meeqqanut ulloq unnuarlu paaqqinnittarfinnut inissinneqarsimasunut tikeraarluni angalaartitsarnissaq siunertaasimanngisaannarpoq. Pisuni taamaattuni eqqartuunneqartoq anisinnaanersooq aamma aneqqusaanersooq unnerluussisussaataasup aalajangertarpaa.

Taamaammat tikeraarluni angalasinnaatitaanerit, anisinnaatitaanermik pisinnaatitaaffeqarnermik naatsorsuuteqarfiusut, pillugit Inatsisartut inatsisaanni aalajangersakkanit aalajangersaasoqarsinnaanngillat.

Taamaammat meeqqanut pillaatissinneqarsinnaanermut ukiut ammut killingat inorlugit ukiulinnut tikeraarluni angalasarnerit pillugit aalajangersakkani, meeraq eqqartuussut imaluunniit tamanna pillugu eqqartuussiviup aalajangernerata kingorna inissinneqarsimatillugu, tikeraarluni angalasarnissamut pisinnaatitaaffik atuutissanngitsoq Inatsisartut inatsisaanni ersarissumik paasiuminartumillu siunnersuummi matumani allanneqarpoq.

Meeqqanut eqqartuussut imaluunniit eqqartuussiviup tamanna pillugu aalajangernerata kingorna inissinneqarsimasunut siunnersuut taamaallaat atuuppoq. Meeqqanut ulloq unnuarlu paaqqinnittarfimmi kommunalbestyrelsimit innersuunneqarneq tunngavigalugu najugaqartunut, tikeraarluni angalasinnaatitaaneq ullumisut allanngortinneqarnani atuutissaaq.

Taamatut oqaaseqarlunga oqaluuserisassaq Inatsisartuni suliarineqarnissaanut tunniuppara.